

OPERSE X VERA

**Un página di kurashámentu i guia
spiritual pa
miembran di Scouting Antiano
Edishon 67 Febrüari 2017**

Un poco Orashon, ta bon pe Kurason

I no laga e manera di pensa di e mundu aki forma boso, al contrario, laga Dios transformá boso i duna boso un manera nobo di pensa. E ora ei boso lo konstatá kiko E ke di boso, esta loke ta bon, agradabel i perfekto (Romanonan 12:2).

* Pa e Pas Ku Ami Por Traha P'e.

Señor Dios Mansu,
Abo ta un Dios di Pas
Per tòg mi ta mira guera, odio, diskushon i violensia rònt di mi.
Kiko ta pasa ku hende?
Por ta, bo Evangelio no ta ofresé suficiente pas?
Por ta, nos kondishon di hende rasional no ta hasi posibel, pa nos por biba den armonia ku otro?
Mi mes ta sinti tin biahia ku mi ta kontagia ku un aktitud di guera:
guera den mi kurason,
guera den mi egoismo,
guera den e bon ku mi por hasi i mi no a hasié.
Siñá mi den e dia di awe kiko ta pas berdadero.
Siñá mi e kaminda di pas,
ku ta hibá mi mas serka di mi rumannan.
Mustra mi e talentonan di mi ruman i di mi mes.
Siñá mi mira bo lus ku ta guia nos riba bo kaminda.
Si Señor, Bo boluntat sea hasí.
Amén.

* E Ruman.

Awe mi tin gana di papia ku Kristu.
Pasobra E ta Dios i E ta Hende.
I asina den su kondishon humano,
mi ta su ruman.
Mi bon Hesus,
Bo ruman ta papia.
Pakiko mi ta papia ku Bo?
Mi sa ku mi por papia ku Bo
Pasobra Bo tin orea di ruman,
meskos ku mi.
Mi Bon Hesus, ta bo ruman
ta papia ku Bo.

Dia pa dia,
Ora pa ora, mi ta realisá
kuantu amor mi falta pa mi ta Bo ruman.
Mi ta papia ku Bo. Danki pa Bo Palabra!
Mi ta gaña si mi bisa ku mi ta stima Bo
i tur e hendenan ku Bo a duná mi komo ruman.
Lo mi stima nan di bérdat, no solamente ku palabra, pero manera Abo ta stima mi.
Hesus, ta Bo ruman ta papia;
esun ku ta den hopi nesesidat;
esun ku tin hopi kos bon i otro no asina bon, pero ku gana di kambia nan;
ku anhelo pa krese i parse Bo mas i mas.
Mi ta pidi pa Bo duna tur mi ruman un man.
Ruman Hesus, move mi kurason i mi lenga pa mi por yamá Bo semper..... Mi Ruman.
Amén.



* Pa Haña Balor di Mi Mes.

Dios Tata,
Bo a krea mi na Bo imágen i semehansa.
Pero pika a separá mi for di Bo.
Pero Hesus a bin hasi mi Bo yu atrobe.
Bo ta mi Tata.
Hopi biahia mi ta lubidá mi identidad.
Mi ta lubidá ku mi destino ta serka Bo.
Mi ta lubidá balor di mi mes.
Mi sa deskuidá mi salu.
Kuantu hende di mi edat ta daña nan salu ku alkohòl i droga?
E kurpa ku Bo a duná mi ta un regalo pa mi kuida.
E kapasidat ku Bo a duná mi ta pa mi sirbi mi próhimo.
Mi no por stima mi próhimo si mi no stima mi mes, Asina Bo Evangelio ta bisa.
Siñá mi kuida mi salu.
Siñá mi kuida salu di otro hende tambe.
Siñá mi tene mi ambiente limpi.
Siñá mi respetá mi mes i otro hende.
Siñá mi apresiá kapasidat di otro i di mi mes, poniendo nan tur na sirbishi di komunidat.
Pa mi deskubrí kada dia ku mi ta Bo yu i Abo ta mi Tata.
Lag'é t'asina.
Amén.